



留下麼个

一生人，做得食幾多歲，麼人做得按算？單淨，閻羅王个生死簿項訂等，無人有法度好偷看！有兜人命長，做得食過百歲；有兜人命短，一出世無幾久就損忒！命長抑係命短，自家實在無法度主意。有兜人命靚，對出世到過背，總係過等好日仔；有兜人命歪，從出世到過身，衰過艱苦係唯一个形容！命靚抑係命歪，自家做得選擇、決定个又有幾多？一生人，不管命長命短、命靚命歪，總愛留下麼个，分自家个人生有意義、有價值！

一生人，愛留下麼个，分自家个子子孫孫？係土地屋舍、錢銀財產，還係一種精神、一種價值？吾丈人老一生人，在田坵耕種絡食，同丈人哀牽手連心，生養一群大細、繳子女讀書、望子女成人長大。看得著个係，佢留下一甲五分个田地財產，分自家个舖娘子女；看毋著个係，佢一生人在田坵肚篤實耕種、煞猛種菜个身影，還有毋會在子女面前唉唉唧唧、呻聲喊苦个形象，留在吾个心肝肚、腦海中。不管係看得著个，抑係看毋著个，全部係吾丈人老一生人所留下來个。

一生人，愛留下麼个，分自家个家鄉社區？係人人欽羨个財富地位，還係人人尊敬个好名聲？陳以諾牧師，在南庄長老教會牧會三十一年，盡大个業績，毋係領受洗禮个教友變多咁，乜毋係佢領著个謝禮比別位个牧師較多！係佢同天父上帝个痛惜，帶入咁南庄社區！分偏鄉南庄个青少年、有學習木笛、分享音樂个機會；分南庄人有參與社區、音樂造鄉、改造社區个希望！不管係愛餐，抑係社區音樂會、送溫暖个慈善活動，還係南庄兒童个夏令營、冬令營……，陳牧師總係帶頭去做。佢看得著陳牧師對南庄、南庄人个痛惜，佢乜看得著參與其中个南庄人，感受著牧師个痛惜！陳牧師留分南庄、南庄人个係淦淦个痛惜！佢一生人，心心念念上帝个痛惜，做得在南庄永久流傳。

一生人，愛留下麼个，分自家个族群社會？在臺灣，面對強勢族群个語言文化衝擊，弱勢族群像客家，語言文化个傳承，面臨重大个危機！係講自家係客家人，係講自家認識著這種危機，係毋係會想愛同自家个語言文化搶救起來、傳承下去？摺這傳承語言文化个行動、心意同精神留下來、傳下去，就像三十年前客家族群个「還僮母語運動」，感動當多人，來向政府討轉自家族群个語言文化權利，乜感動當多人，加入傳承自家語言文化个行列。

一生人，愛留下麼个，分自家个親朋好友、家鄉社區、族群社會？一生人，愛留下麼个價值、麼个意義分自家？值得自家定定仔去思恤、去追尋。

作者：邱一帆

☆詞彙學習☆

【一生人】id` sen` ngin`：一輩子。

【按算】on son：事先預估。

【損忒】sun` ted`：折損、夭折。

【過背】go boi：過世。

【過身】go siin`：過世。

【唉唉唧唧】ai` ai` jid jid：嘆息呻吟。

【呻聲喊苦】cen` sang` hem` ku`：唉聲叫苦。

【痛惜】tung xiang`：疼愛、珍惜。